

आकाशवाणी जम्मू

Mid-Day Dogri News Bulletin,

23 August 2025 समा - 12:25 hrs.

LG -CIPS Awards

उपराज्यपाल मनोज सिन्हा होरें आक्खेया जे कोई बी सरकारी नीति लोकें थमां सुझा लेइयै उन्दी जरुरतें साब्बै गे तयार कीती जानी लोडचदी ते नीतियां दफ्तरें च नेंई सगुआ, जमीनी स्तह पर जाइयै लोकें कोला सलाह लेइयै उन्दी भलाई-बेहतरी गी ध्यानै च रक्खदे होई तयार कीतियां जानी चाहदियां। LG होरें एह गल्ल कल श्रीनगर च CIPS अवार्ड दे जेतुएं गी सम्मानित करने लेई आयोजित इक कार्यक्रम च आक्खी। अपने सम्बोधन च LG होरें सब्भतें जेतुएं गी इस प्रतिष्ठित पुरस्कार लेई मबारकवाद दिती। उनें आक्खेया जे CIPS पुरस्कार इक जरिया ऐ, उनें लोकें गी सम्मानित करने दा, जेहडे समाजी ते आर्थिक तरक्की गी बढावा देने दे कन्नो-कन्नी होरनें गी बी प्रेरित करदे न जे ओह सार्वजनिक प्रणालियें ते समाज च बदलाव आनने आली पैहलकदमियें कन्नै जुडन ते एहदे च अपनी महत्वपूर्ण भूमिका निभान।

<><><><><><>

Govt. -Jet Schools

सरकारै ऐसे 215 स्कूलें गी अपने इख्तेयार च लैने दा हुकम जारी कीता ऐ, जेहडे सिद्दे जां परोक्ष रुपै च प्रतिबंधत संगठनें कोला मानता हासल न, जिन्दे च जमात-ए-इस्लामी ते फलाह-ए-आम ट्रस्ट वगैरा शामिल न। इनें स्कूलें गी सरकार आसेया अज्जै थमां अपने इख्तेयार हेठ लैने दी मेद ऐ, जेहदे लेई सब्भै तयारियां करी लैती गेदियां न। भारत सरकार दे गृह मंत्रालय आसेया 28 फरवरी 2019 दी अधिसूचना नम्बर 1069 (ई) ते 27 फरवरी 2024 दी इक होर अधिसूचना नम्बर 924 (ई) जेहडियां 1967 आहले गैर-कनूनी गतिविधियें

पर रोक सरबन्धि कनून दी दफा इक ते 3 तैहत जारी हुकमै मुजब जमात-ए-इस्लामी जम्मू-कश्मीर गी इक गैर-कनूनी संगठन घोषत कीता गेदा ऐ।

<><><><><><>

CM –Sainik School

सैनिक स्कूल नगरोटा नै अपना 56मां स्थापना दिवस इक महत्वपूर्ण उपलब्धी कन्नै मनाया। मुख्मन्त्री उमर अब्दुल्ला होरें इस मौके पर नमें बनाए गेदे कुड़ियें दे होस्टल –“त्रिवेणी” दा उदघाटन कीता। इस दौरान मुख्मन्त्री होरें गी Guard of Honour कन्नै सम्मानित बी कीता गया। उनें शौर्य स्मारक पर जाइयै वीर-बहादुरें गी श्रद्धांजलि अर्पित कीती। कार्यक्रम च 16 कोर दे GOC, HQ Lt. General P.K. Mishra ते कोर दे COS HQ Major General Paramvir Singh Dagar सने सेना दे वरिष्ठ अफसरें शिरकत कीती।

<><><><><><>

Khadse -JK Youth

केन्द्रीय खेडु ते युवा मामले सरबन्धी राज्यमन्त्री रक्षा खडसे होरें आक्खेया जे 2047 तोड़ी विकसित भारत दा लक्ष्य हासल करने लेई जम्मू-कश्मीर ते एहदे नौजवानें गी बड़ी महत्वपूर्ण भूमिका निभानी ऐ। उनें आक्खेया जे प्रधानमन्त्री नरेन्द्र मोदी हुंदे इस सुक्खने गी पूरा करने च ते दैसे गी अगगे लेइयै जाने च जम्मू-कश्मीर दे युवाएं दी बड़ी महत्वपूर्ण भूमिका रौहगा। खडसे होरें एह गल्ल जापान च अगले बरे होने आहली एशियाई खेडुं लेई Sher-e-Kashmir Indoor स्टेडियम च वुशु Trials च शिरकत करदे होई आक्खी- जेहदे च तकरीबन 200 शा मते खडारियें हिस्सा लैता। मन्त्री होरें आक्खेया जे केन्द्र सरकार जम्मू-कश्मीर दे युवाएं गी खेडुं कन्नै जोड़ने दी पूरी-पूरी कोशश करा रदी ऐ तां जे ओह देसै लेई मैडल जितियै भारत दा नां रोशन करना।

<><><><><><>

Khelo India Water Sports

श्रीनगर च आयोजित खेलो इंडिया वाटर स्पोर्ट्स Festival-2025 दे दुए रोज कल मध्य प्रदेश नै बेहतरीन प्रदर्शन करदे होई सब्भै 4 सुन्ने दे तगमे अपने नां करी लैते। एहदे कन्नै गै मध्य-प्रदेश दी टीम हून अंकतालिका च कुल 7 तगमे कन्नै पैहली थाहर पर ऐ। इंदे चा 4 सुन्ने दे इक चांदी दा ते 2 कैह दे तगमे शामिल न। इसै चाल्ली ओडिशा दी टीम 1 सुन्ने दा ते 3 चांदी दे तगमे जितियै कुल 4 तगमें कन्नै हून दुई थाहर पर पुज्जी गेदी ऐ। मेजबान जम्मू-कश्मीर दी टीम त्री थाहरा पर इक सुन्ने दा, इक चांदा दा ते इक कैह दा तगमा जितियै कुल 3 तगमे अपने नां करियै प्रतियोगिता च अगगे बधा रदी ऐ।

<><><><><><>

DM -Vehicle Modifications

जम्मू दे जिला मैजिस्ट्रेट डाक्टर राकेश मिन्हास होरें साफ कीता ऐ जे लोकें आसेया दायर कीती गेदियें, आपतियें ते चिंताएं गी दूर करने लेई हाल च जारी गड्डियें च बदलाव ते सुधार करने आहले हुकमै मुजब, एह मॉडीफिकेशन छडी उनें गड्डियें च कीती जाहग जिन्दे च गड्डी आहलें, अपनी मर्जी कन्नै कोई बदलाव कीते देन जेहडे निर्माता कम्पनी दे बुनियादी नियमें कोला हटियै बक्खरे न। जारी हुकमे च आक्खेया गेदा ऐ जे गड्डी मालकें गी ओ सब्बै चीजां हटानियां होगन, जिन्दे नै सिडक ते ट्रैफिक नियमें दी खलाफवर्जी हुन्दी ऐ जां सार्वजनिक सुरक्षा लेई असुविधा जां खतरा पेदा हुंदा ऐ, जियां जे प्रेशर हार्न, काले शीशे, सामने आवारदी गड्डी दे ड्रैवर दी अक्खी च पौने आहली हार्ड-इन्टेन्सरी लाइटां वगैरा। डिप्टी कमीशनर होरें अगगे साफ कीता BIS आसेया मंजूरी दिते गेदे एलॉय व्हील पर कोई रोक नेही होग। इस बारे मीडिया कन्नै गल्ल करदे होई जिला मैजिस्ट्रेट जम्मू होरें आक्खेया.....(बाईट)

<><><><><><>

Udh- HADP Ist Rank

जम्मू-कश्मीर च समग्र कृषि विकास (HADP) गी लागू करने च उधमपुर जिले नै जुलाई 2025 च पैहली थाहर हासल कीती ऐ। एह जानकारी उधमपुर दियां डिप्टी कमीशनर सलोनी राय होरें जिले च इस कार्यक्रम दी अमलावरी दा आकलन करने लेई इक बैठक दी अध्यक्षता करदे होई दिती। एहदा मकसद अंतर-क्षेत्रीय तालमेल गी मजबूत करने ते कन्नो-कन्नी, करसानें गी लाह हासल करोआने लेई महत्वपूर्ण सरकारी योजनाएं दी समे-सिर ते असरदार अमलावरी यकीनी बनाना ऐ। बैठक दौरान DC होरें मुतलका मैहकमे गी निर्देश दिते जे ओह इस योजनाएं तैहत मते कोला मते करसानें गी जोड़न ते कुसै बी कमी गी असरदार तरीके कन्नै नबेड़ियै एहदी पुज्ज बधाने लेई सक्रिय उपा करना।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आह्ला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>